



Сыр бойы

5 қазан, сенбі 2024 жыл



№153-154 (20827-20828)

Қызылорда облыстық қоғамдық-саяси газет. 1929 жылдың 1 шілдесінен шығады

- www.facebook.com/syrboyi.kz/
- www.instagram.com/syrboyi_kz
- t.me/syrboyi_kz
- twitter.com/syrboyi

/// ПРЕЗИДЕНТ

ҚОҒАМ АЙНАЛАСЫНА БЕЙЖАЙ ҚАРАМАЙТЫН АЗАМАТТАР АРҚАСЫНДА ДАМИДЫ

Мемлекет басшысы Қасым-Жомарт Тоқаев барлық деңгейдегі мәслихаттар депутаттарының II республикалық форумында сөз сөйледі.

Президент өз сөзінде мәслихаттың мемлекеттік биліктің өте маңызды тармағы екенін атап өтіп, 2022 жылы референдум арқылы Конституцияға маңызды өзгерістер енгізілгеніне, соның нәтижесінде Парламенттің рөлі айтарлықтай күшейгеніне, жалпы билік институттарының жұмысын жетілдіру үшін нақты шаралар қабылданғанына назар аударды.

– Онда жергілікті өкілді билікке қатысты мәселелер де бар. Атап айтсақ, облыстық мәслихат сайлауы аралас жүйе арқылы өтеді. Ал аудандық депутаттар тек қана мажоритарлық тәсілмен сайланады. Бұл қадам еліміздің демократиялық жолмен дамуына зор серпін берді деп сеніммен айта аламыз. Ауқымды реформаның нәтижесінде саяси бәсеке жандана түсті. Жаңа ережеге сай өткен сайлаудан кейін мәслихаттарға жаңа адамдар келді. Алты саяси партияның өкілдері депутат мандатына ие болды. Қазір мәслихат мүшелерінің оннан бірі ғана – партиялық тізімнен келген депутаттар. Қалғаны түгел – бір мандатты округтен сайланған азаматтар. Өзін-өзі ұсынған – 434 адам депутат атанды.



Ашығын айтсақ, бұрын саяси партиялар түрлі санаттағы азаматтармен жұмысқа көп көңіл бөлмейтін. Заңмен талап еткеннен кейін ғана мән бере бастады. Мысалы, партиялық тізімде жастарға арнайы квота бөлінді. Бұл шешім олардың қоғамдық-саяси үдеріске араласуына жол ашып берді. Бұрын мәслихаттағы жас азаматтардың үлесі 2 пайызға да жетпейтін. Қазір заңнамаға енгізілген өзгерістердің нәтижесінде бұл көрсеткіш еселеп артты деуге болады. Бүгін де ортамызда көптеген жас депутаттар отыр. Олар түрлі мінберден жастарға қатысты өзекті мәселелерді батыл көтеріп жүр. Өкілді билікте әйелдердің қатары көбейе түсті. Елімізде қыз-келіншектердің бастамаларына жан-жақты қолдау көрсетіледі. Әйелдердің құқығын қорғауға баса назар аударылып жатыр. Осының бәрі реформаның нақты нәтижесі екені сөзсіз, – деді Қасым-Жомарт Тоқаев.

Президент депутаттардың өкілді билік функциясын халықтың сеніміне сай жоғары деңгейде атқаруына қажет бірнеше мәселеге тоқталды.

Ең бірінші кезекте, мәслихат депутаттарының білктілік деңгейін жоспарлы түрде арттыру керек.

– Мәслихаттар – жергілікті өзін-өзі басқару жүйесіндегі негізгі институт. Сондықтан оның тиімділігі депутаттардың кәсібилігіне тікелей байланысты. Біліміне білігі сай депутаттар

корпусын жасақтауға, ең алдымен, оларды ұсынған партиялар мүдделі болуы керек. Бүгін мәслихат депутаттарының білктілігін жетілдіру туралы ұсыныс айтылды. Мәслихат депутаттары қызметінің тиімділігін арттыру үшін бұл бағытқа ерекше назар аудару қажет. Бұған Мемлекеттік басқару академиясын тарту керек. Партиялар өз депутаттарының білктілігін жетілдіру мақсатында Академиямен ынтымақтастық орнатқан жөн деп санаймын. Әрине, бұл жұмысты аймақтың ерекшеліктерін, халық қалаулыларының кәсіби және қоғамдық-саяси тәжірибесін ескере отырып ұйымдастыру қажет. Сонымен бірге депутаттар халықпен тікелей байланыс жасай білуге және өз жұмысы туралы қоғамды жан-жақты хабарлар етуге тиіс. Мойындауымыз керек, бұл істе көзге көрініп тұрған кемшіліктер бар, – деді Президент.

Мемлекет басшысының пікірінше, мәслихаттардың жергілікті экономикалық саясатқа ықпалын арттыра түсу мәселесіне айрықша мән берген жөн.

– Қазір жаңа Бюджет және Салық кодекстері әзірленіп жатыр. Онда жергілікті өзін-өзі басқаруға қатысты реформаның ерекшеліктері ескерілуі тиіс. Үкімет ауыл әкімдерінің бюджетін қалыптастыру және оны жұмсау тәсілдерін қайта қарауы керек.

2-бет

«ҚАЗАҚСТАН ХАЛҚЫНАН» СЫЙЛЫҒЫ: Аймақтар арасында Қызылорда бірінші

Астанада өткен III Ұлттық қайырымдылық конференциясы аясында қайырымдылықты дамытуға елеулі үлес қосқан адамдар мен ұйымдарға «Қазақстан халқына» қоғамдық қоры тағайындаған арнайы сыйлықтар табысталды.

Сыйлық «Қазақстан халқынан» деп аталады, яғни қордың атауымен үндеседі. Баршамыз Қазақстанның біртұтас халқы екенімізді көрсетіп, қайырымдылық жасаушылар мен көмек алушылардың бірлігін бейнелейді. Жүрек және бионикалық қолмен безендірілген шыны стелла қайырымдылық, инновация және ғылым арасындағы байланысты білдіреді.

Салтанатты рәсімде Қызылорда облысының әкімдігі өңірдегі оңалту және медициналық қызметтер бағдарламасын қолдағаны үшін «Аймақтың игілігі үшін стратегиялық альянс сыйлығымен» марапатталды. Бұл сыйлықты аймақтар арасында бірінші болып тек қана Қызылорда облысы иеленді.

Сыр өңірі «Қазақстан халқына» қоғамдық қорымен тығыз әріптестік байланыс орнатқан. Қор аутизм және басқа да ақыл-ой жетіспеушілігі бар балаларға арналған орталықтарды жабдықтауға, сенсорлық бөлме орнатуға, орфандық аурулары бар пациенттерді дәрілік заттармен қамтамасыз етуге қолдау көрсетті. Медициналық генетиктер мен ультрадыбыстық диагностика мамандарын шетелде оқыту, шала туған нәрестелерге офтальмологиялық скрининг жасайтын және емдейтін жабдықтар алуға мүмкіндік жасады.

Облыстық балалар ауруханасы базасында «Қамқорлық» реабилитациялық орталығы ашылып, аса қымбат дәрі-дәрмек алынды. Қор облыстық онкология орталығын республикада 3 облыста ғана бар, құны 1 млрд 100 млн теңге тұратын скринингке арналған жылжымалы медициналық кешенмен қамтамасыз етті.

Жаңақорған ауданында да «Қамқорлық» оңалту орталығы ашылып, озық үлгідегі жабдықтармен жарақталды. Дәл осындай нысан жыл соңында Арал ауданында да ашылады. Жалпы қордың қолдауымен 3,699 млрд теңгеге ауқымды жұмыстар атқарылды.

«Қазақстан халқынан» сыйлығының басқа да ата-алымдарына тоқталсақ, ауыл мектептерін дамыту, дәрі-дәрмекпен қамтамасыз ету және оңалту бағдарламалары бойынша жобаларды іске асыруға мүмкіндік берген 30 млрд теңге көлеміндегі қайырымдылық жарнасы үшін «Ерекше қайырымдылық қолдау сыйлығы» ERG Еуразиялық тобына берілді.

2-бет

/// ҚҰРЫЛЫС ҚАРҚЫНЫ

АЙШЫҚТАЛҒАН АЛТЫ ҮЙ

Кейінгі кезде сәулеті артып, көркейіп келе жатқан шаһардың келбетіне көз тойды. Әсіресе, Сырдың сол жағалауында құрылыс қарқыны жоғары. Оны ең алдымен қалаға келген қонақтар аңғаратыны сөзсіз. Өңір тұрғындары үшін жағымды жаңалықтың бірі – жеті қабатты тұрғын үйлердің бой көтеруі. Былтыр сәуір айында басталған үйлер жыл соңына дейін пайдалануға берілімек. Біз құрылыс басына барып, қызу тірлікті көзбен көріп қайтқан едік.

Сол жағалаудағы өзгерлерге ұқсамайтын бұл үйлердің сыртқы бейнесі ерекшелігімен мәнмұндайды. Бір аумақтағы 6 тұрғын үй айналыра салынған. Құрылысы 90 пайыз аяқталыпты. Ауа райымен санаспаған құрылыс білектілердің тынымсыз жұмысының нәтижесі деуге болады. «Орион LTD» ЖШС мекемесінің шебері Дәурен Қозбақов бұл салада екі жылдан бері жұмыс істейді.

Біздің мекеме екінші тұрғын үйдің құрылысын жүргізді. Мұнда іргетасын қалаудан бастап, барлығын жасадық. Одан кейінгі сылақ, кафель жапсыру секілді ішкі жұмыстарды да аяқтадық. Енді жұп тазартуға кірісеміз. Қаламызда осындай әдемі, әсем үйлердің салынуына өз үлесімді қосқаныма қуанамын, – дейді ол.

Әр үйде 84, барлығын қосқанда 504 пәтер бар. Кең дәліздегі төрт пәтердің біреуі 2, қалғаны 3 бөлмелік. Бөлмелер



Суретерді түсірген Нұрболан Нұрмұхамбет

кең әрі жарық. Үш бөлмелі пәтердің аумағы 80 шаршы метр.

– Бұл үйлердің құрылысын «Аман Құрылыс», «Орион LTD», «Риголит», «Промсервис», «Абу-Сер» мекемелері жүргізді. Бүгінде жұмыстың 90 пайызы аяқталып қалды. Барлығы заманауи бағытта және жаңа технологиялардың көмегімен салынған. Жеті қабатты болғандықтан, лифт қарастырылған. Аула ішін көркейту, газон егу, балаларға арналған ойын алаңын салуды «Алтын Айдарлық» мекемесі жүргізді, – дейді қалалық құрылыс бөлімінің маманы Мәулен Бобетаев.

Жалпы қазіргі таңда шаһардың сол жағалауында 16 тұрғын үй салынып жатыр. Оның ішінде 6-уы жеті қабатты болса, қалғаны бес қабатты. Баспаналы болуға асығып жүргендердің қоныс тойының ауылы алыс емес секілді. Желтоқсан айының ішінде жағымды жаңалықты бөлісетін боламыз.

Айсұле ҚАРАПАЕВА, «Сыр бойы»

/// САРАП

ҚОҒЫС АСПАННАН ТҮСПЕЙДІ

Күнделікті жұмысқа баратын жолымда екі қоқыс алаңы бар. Ертеңгілік қасына көлік тоқтап, жүксалғышынан қалпа-қалта қоқысты шығарып тастап жатады. Өзіміздің шағын ауданның тұрғындары қалдықты үйінен көлікпен тасымалдамайтыны анық. Не де болса, маңайдағы жер үйлердің тұрғындары. Біреулер қоқысқа кететін шығынды осылай үнемдейтін шығар, кім білсін? Кейбіреуінің келісім-шарты болуы да мүмкін. Кешкісін контейнерлердің аузы-мұрнынан шыға толғанына қарап, кездейсоқ келіп тастайтындар шектен тыс көп пе деп ойлайсың.

Азық-түлік, тұрмыстық техника мен химия, киім өмірімізге жайлылық сыйлаған соң қоқысқа айналатыны заңдылық. Бірақ ауа жұту, тамақ ішу сияқты табиғи қажеттіліктер қатарына қоқыс шығаруды қоспайтынымыз бар. Содан болар, ішіп-жегені мен тұтынғанынан қалғанды кез келген қоқыс жәшігіне немесе белгіленбеген жерге лақтырып кетудің тыйылмай отырғаны.

3-бет



Фото: Аиша Әбішев

